

四庫全書

集部

欽定四庫全書

弇州四部稿卷五十二

明 王世貞 撰

詩部

七言絕句一百二十五首

梓于鱗集有感八絕句

屈指燕臺被髮時
調高長惜和人誰
何人不誦陽春句
只有君身那得知

其二

星河蕭瑟瀉瓊泉
雪嶺峩嵒刺九天
不道鍾期身尚在
轉翻山水伯牙絃

其三

東去名山是岱宗
千秋長聳碧芙蓉
誰能拄杖天門裏
細數瑤樓十二重

其四

雪樓高傍嵒湖濱
消渴頻年卧白雲
問得兒駒留草在

教人翻恨卓文君

其五

若問陵陽剖後名雙懸皎月照咸京不然仍隱荆山去
看即須償十五城

其六

珊瑚七尺射吳天十萬驪珠顆顆圓解道人間饒異寶
老夫親自見沈淵

其七

與君當日共三餘毫腐囊收定不如一字雕成真玉葉
千秋忽發塚中書

其八

柴門却掃自無塵吟憶君詩靜憶身縱有餘年那足羨
白頭誰是守玄人

將訪何元朗翰林先寄

布帆無恙出雲間泖色峯陰相對閒任使子猷歸興發
那能不訪大何山

其二

何家食品舊堪厭
新議成來似稍廉
我自清齋布袍客
不妨唯有水晶鹽

故陳提舉虞山湖園有感

前牕湖水後牕山
桃李棠梨樹樹殷
薄行只應紅粉是
別將春色傍人間

其二

尊前春事競爭新
忽憶陳王句裏人
屈指古今行樂處

祇應唯有片時真

吳門遇朱公子扶母喪歸有贈二首

吳閭鐘動月初弦
騷屑悲風攪夜眠
不為斗間新劍氣
何因得喚孝廉舩

其二

三匝啼烏無樹依
江南春盡見霜飛
知君不領胡威絹
鷄骨支牀一布衣

酒間偶題

人言酒是銷愁物不到醉時愁不休今日較來無一事
偶因杯酒却生愁

其二

解道死生俱是夢縱饒勘破亦奚為何如總付不思議
權向糟丘住幾時

湯上人索詩若祖惠休以詩名然作僧不了書此
勉之

偷然一鉢一軍持坐到忘言了不疑却笑惠休緣底事

逢人教擬碧雲詩

徽宗馬圖

天閑萬馬盡權奇
寫出丹青意自悲
長白山頭三萬匹
可令龍種一雄嘶

朱宸御堇母

浦西阡畔草離離
腸斷憐君負土時
烏鳥能啼兩行血
白楊偏送四時悲

其二

手栽松柏淚和煙念母誰如朱百年一自寒廬鷄骨後
至今猶道不禁綿

沈嘉則作竈乃金陵趙子實法也子實索言又為
口占一絕

一肩行竈付奚奴欲採寒山處處蘇煮得涼州泉水熟
不將身到酒家胡

倚家弟調送張元春游嶺南四絕

朔風吹雨欲成花病起青衫便離家此去不愁腰帶減

古來勾漏有丹砂

其二

粵女簪頭紅佛桑夷歌一曲壓君觴莫嫌椰酒難成醉
也解寬人萬里腸

其三

筆底江山已自靈千峰匹馬錦囊停荆家莫詫關全好
大庾南頭分外青

其四

小奴全似黑崑崙
雀躍行裝道不貧
留得越中筒布在
綈袍還有舊游人

題畫甌碧牡丹

沈香亭畔玉僂俄
疊疊春山捧翠螺
何似江南天水碧
周娘親為剪宮羅

周公瑕導余至胥口不能渡走筆有嘲

不煩風浪便迴舟
興盡真成王子猷
猷若遇鷓夷應大笑
笑君難作五湖游

兩山竹枝歌

橘綠橙黃香滿枝
篦頭篳玉鱸魚絲
山中歷日由來少
知是江南九月時

其二

白雪繅成繭子綿
黃雲剪就稻花天
千家村裏無開市
三尺溪頭有繫船

其三

短短釵銀壓鬢鴉
圍腰羣捉木綿花
莫嫌村塢行人少

夫婿經商不在家

其四

峩舸大艚碧波間
徧截玲瓏相載還
最是三吳多好事
家家分得洞庭山

題虎丘劔池

吳王愛女瘞山丘
寶劔三千白虎游
當時未解平親怨
又見胥江洗屬鏤

陸羽泉

康王谷瀑中冷水何似山僧屋後泉
客至試探禪悅味
玉團初輾浪花圓

白蓮池

曉風零落滴瑤華
游女爭褰似若耶
若問什公應有解
淤泥元自出蓮花

養鶴澗

龍華會上僊音鳥
任是青田未許同
肯向遠公爭卓錫
祇憑支遁一開籠

贈胡生

禿衿單幘據胡牀
白眼狂呼罄索郎
不為螟蛉收不得
千山秋色滿奚囊

贈新蔡李生

十日平原酒未醒
千迴謔浪不曾停
從他婁水能如眼
可似王家伯仲青

其二

縹緲樓前玉萬家
銀餅美酒不須賒
請看正月江南雪

争似河南二月花

答徐文果

雪壓湖綿鱸水晶書郵歲歲不曾停縱然若雪如雙眼
可似徐郎分外青

贈封比部金翁

緋衫不礙鬢絲蒼令子承恩在帝鄉欲識故園山色好
一官猶號白雲郎

其二

龍章親捧帝音歸七十無聞自古稀
種得林田都是酒
不須隨處典朝衣

贈蘇山人

讀君鸚鵡怨中辭何似東方愛滑稽
俳調一成天笑動
黃金將出換蛾眉

金翁八十矣為小祇園作新詞遊戲
三昧語走筆
為謝

長千里頭春事繁
家家玉樹待君翻
多情却是頻伽鳥

自譜僊音供世尊

其二

詞塲海內舊知名到處烟花月旦評若使維摩天女在
白蓮將贈古先生

瓜步山

佛狸南牧已千秋百草猶沾毳殿愁驅得玉庭還大漠
高皇九葉奠神州

登蛾眉亭有感

回首江南黯澹雲蛾眉亭畔思紛紛何因却作姑溪水
流到長江尚不分

姑溪水流長
江自為一帶

望鍾山

劃成天塹抱天關鐵馬戈船日日閒九葉神孫當北極
千年紫氣滿鍾山

黃石磯

黃石磯頭波亂流前軍銃吹後宮愁莫因魚服憐牙爪
自有真龍在上游

阻風安慶

長憐拙宦似今朝
愁水愁風上漢遙
何似長年回鷁去
滿帆秋色下楓橋

從彭澤望廬山決策往游示同舟者

看盡千峯意不關
青天忽接是廬山
來朝紫氣君休恠
身在差峩峭嶮間

董中丞淑化寄餉酒貲

潯陽江波波刺天
峭風偏對下江船
從他九日灘頭坐

乞得中丞買酒錢

九江道中大風

烏頭千樹捲秋蓬
亂激飛濤拍大空
坐起船牕渾不覺
此生原慣石尤風

江口望鄱陽湖感事

十萬樓船不得驕
洪波血立注青霄
天弧一舉旄頭落
不似潯陽枉射蛟

過九江風迅不克上匡廬自嘲

月滿清尊霞滿裾何人不信上匡廬東風一夜吹帆去
估客江陵也不如

江州問琵琶亭

亦知遷地勝長沙無那中年易憶家
裁唱楚歌頭便白
不須遙夜聽琵琶

戲題赤壁

越州蘭亭千載奇黃州赤壁今半之
若使舟人不解說
一拳頑石草迷離

道士泐

云即西塞山也

西塞山頭啼杜鵑
湔濤百尺瀉樓船
總令漁父心無事
耐可中流倚醉眠

泊樊口

千條弱縷拂輕羅
盡日無風少見波
不到武昌應不恨
一尊樊口聽漁歌

偶覽元白長慶集有感逝者

莫悲長慶元丞死
更覓劉郎伴白頭
何事調高酬不得

一生春雪半生愁

程孟孺謁余武昌以是日至而余以是日發因偕
登廬嶽各返故里遂成二絕為贈並呈豫章諸王

孫

君作游人上武昌我為遷客下潯陽何如一醉匡廬色
歸卧滄江紫氣傍

其二

豫章隆準漢王孫推食能將國士論君去但誇廬嶽好

此曹無念落朱門

小飲東林戲成

雙旌曙色轉逶迤
那似門人籃筍遲
今日白蓮無酒禁
可知游客不攢眉

余次得邸報姚繼文少卿南太常子卿太僕因寄
一絕

我徙蒼梧君豫章
君游留省我金閭
司空自有華陰土
一拭能令兩劔霜

寄用晦君頗事丹術聊此志規

彭蠡春流白雪聲
小山朱邸暮雲橫
枕中那得無鴻寶
其若當年誤更生

哭王君載四絕

婁江雲色黯羊眠
知道王家玉不全
七尺併埋千卷去
的應天上勝頑僊

其二

休論騎馬與衣朱
一領襴衫未破除
欲向文君探舊草

可憐強半制科書

其三

耳邊猶似歎高山，忽斷飄風去不還。
君到夜臺無李白，也堪惆悵憶人間。

其四

圍棋詩酒黯然收，便好風光懶去游。
若向菜蔬新算過，可能無淚滴心頭。

江上別黃生

東風吹冷軟金卮拋盡江南桃李枝佳麗不關垂柳事
春來偏自解成絲

其二

睡醒雙筋印微紅小立江干怨曉風莫問長安天近遠
酒人多在夢魂中

贈龔克懋文學

潦倒青衫也不貧濟南詩樣誦來新相逢莫恠難分手
白雪樓中縱酒人

克懋藏于鱗卷後

隻字能令白雪高銀鈎數紙不辭勞青箱欲鏘應須鏘
聞道人間購鳳毛

題于鱗集後

千秋白雪成真賞語向斯人已不知猶勝伯牙絃絕後
一生無處覓鍾期

聞朝鐘偶成

殘月含輝曙色疑未央鐘響度花遲披衣欲出仍顛倒

道是寒山夜半時

初入朝屈指去國十九年矣有鷺子鬢白者聊以

自嘲

禿節漁陽去不還當時無夢更朝天莫驚容鬢如蘇武
若個能禁十九年

送林承熙太學歸吳因簡張幼于

結客休憐金盡時吳閭處處酒為旗懷人但有梅花句
驛使姑蘇到不遲

其二

彩筆秋凋吳苑霜
張家客盡正彷徨
何人直挾奚囊上
掣取南州挂壁牀

康裕卿護朱郎中喪南歸二絕句

布袍甘澆鹿車塵
別酒淒其肯入唇
何限霜前楊柳色
陌頭初贈有心人

其二

平陵結客晚知名
俠骨于今死不輕
若見宗人子元面

莫將蕭育擬康生

贈郭舜舉祠部新婚

才子當今顧彥先
燕中花柳勝伊川
自從二陸為文友
乞得雲間贈婦篇

其二

紅蠟初鎔雙鳳皇
新詩句好自催妝
不須談到如皋後
一笑先應喚郭郎

答許殿卿長史

蓮花簇就濟南山湖上看山盡日閒一札十行文似錦
非關長史戀人間

其二

拂袖淮王桂樹雲遠游名字不教聞自從深得山陰趣
玉室金庭報右軍

其三

親扶拳角汶陽田不向東風費酒錢擁篲蒼頭誇誦賦
搗筍小伎解參禪

其四

踏青風滿白楊枝雲到牙山黯自遲冢上彈琴應莫恠

人間能得幾鍾期

于鱗墓
在濟南

其五

盼子城邊春打圍割鮮呼酒去如飛一從上客申屠府

不道素絲罷相歸

殷相公
時同里

其六

繡斧朱鉦引碧油風光差勝廿年游東州耆舊毋勞羨

鏡裏清霜半上頭

清源雜詠

繡衣柱史何昂藏
自免不復稱為郎
尊前鳳舞花難夜
門外烏啼月是霜

其二

鄭老揖余過鄭園
賣文錢盡強開樽
那知昔日曾游趙
雙璧由來祇片言

其三

清源十日東風顛陳家從事絕可憐不須仗爾誇投轄
我自能停步口船

其四

客腸鬱鬱誰為開任俠何如汪秀才仲冬霜冽不解冷
有時自挾春風來

過分水作

一水雙分作順流風帆喚月不須收拈將印渚脩齡語
翹足微吟下濟州

送沈司訓之仁和

七百里多平水面江南大抵是僊官
寶帶橋頭別親舊
鶯花一路到臨安

其二

西湖是處美人粧天竺松風吹遠梁
便攜罷講諸生去
何必誇他馬季長

其三

手板拋來盡日間吳峯青比玉峯
殷若語傍人應不分

一生長對案頭山

投慈氏寺宿

日落山門閉未曾
必芻前揖大中丞
騶呵散盡篝燈語
元是人間行脚僧

其二

入門金像欣然笑
笑我津梁老此生
堯率天中觀自在
不知賢劍也求名

雪後問春申臺

壽州城內春申臺片片寒花飛作堆
令尹玉纓看不見
舍人珠履踏還來

即事題小亭

過雨山城綠欲齊
一羣嬌鳥踏枝低
不知謝豹今何處
應在春明門外啼

其二

鈴閣沈沈草檄稀
桑榆雖好傍斜暉
莫嗔腐鼠將鷓嚇
元是鷓鷯出世非

對花

一春孤負一春天
半日強拚半日眠
酒病畏深詩畏淺
將何別策向花前

江畔濯纓亭贈柳常侍

一抹青山墮酒卮
濯纓人醉弄連漪
莫驚常侍仍呼柳

曾賦滄波太液池

柳常侍憚有太液滄波晚句

其二

漢江隄畔草芊芊
蠟屐登山醉欲眠
天際香鑪君自見

可能身染玉京烟

荊州圖記云武當山
峯首狀博山香鑪

大廷尉孫公山甫聞予閱兵以六絕句見遺此皆
公節制之師予樂觀厥成耳輒勉奉酬以伸感謝
大府橫開漢水濱天王三錫璽書新君看猛士如雲擁
來聽輕裘緩帶人

其二

山蟠庸漢帶中州水壓襄荊控上游謀帥自來先禮樂
干城元不要公侯

其三

三千組練控雕弧
竦立轅門聽若無
閱罷不須鞭貫耳
此軍原屬鬪於菟

其四

南陽谿子鏃如矛
板楯巴賁虎見愁
俱道普天無白羽
技成何處覓封侯

其五

疊鼓鳴笳漢水渾
牙前飛將按三門
惟來全似吳宮隊

舊帥從知也姓孫

其六

鄖山增色水增波為是清風吉甫多
江漢自來周雅地
可教新句入饒歌

輓程廣文三絕句

九歌垂就涕先零恨殺青衫到底青
昨夜微茫牛斗分
不知飛上作何星

其二

滿地春風避草廬悠然一夢已蘧蘧
由來秘器東園美
不匣儂家萬卷書

其三

三絕風流數鄭虔到頭生事僅寒氊
古來文苑君知否
一卷殘編了百年

寄送姪孫鴻臚定鼎

青衫垂故鬢絲新解帶能眠丞相茵
縱有懸河君莫盡
古來三語定何人

其二

當年公望有安期今日藍田玉一枝若問江東米貴賤
但言王掾未全癡

其三

吳閭風起木蘭橈祖道秋新綠旆驕見說時清官更好
教人何地問漁樵

其四

金馬門前無限春歲星何處不藏身明年社肉初頒後

可向天涯憶遠臣

送孫兆孺還華容

玄經罷草不勝閒
愁遣幽人問字還
別後相思何所道
尊前秋色似君山

其二

鈴閣深沈漏漸稀
新涼綵綵上荷衣
相逢始信無官好
今夜思家明夜歸

趙中丞良弼便道過里為促其行

武昌為祖接天開六月風清御史臺休汝莫令車騎衆
燕中專待一驄來

補題冬日村居四絕

緯蕭風急蠓全肥黃雀頭頭飽不飛自有牽綿新釀在
不煩機婦授寒衣

其二

莫惟田家置酒頻綿花盈積米盈困從他俗飲無妨事
七貴筵頭俗殺人

其三

踏車斟水欲深池看網銀鱗過別陂
刮面西風渾不峭烹魚壓酒夕陽時

其四

衝寒來叩野人家不遣蕭條負歲華
蜜結苔梅俱馨口青蔥簇出水仙花

送於信夫還武陵

千疊青山擁上游戟門翻見武陵舟
鄖江一線成歸路

可似桃花洞口流

其二

拋却銅符十五年談玄倦了復談禪石頭路滑君知否
明月家山自在圓

沈侍御汝材按秦至耀州而卒為四絕輓之

秦中秋畫法星殘祝禔城頭黯淡看從此柏臺烏不住
白楊風色四時寒

其二

抗手輜軒西入秦藍田玉折竟成塵蛾眉班上應愁看
鴻鴈行中少一人兄為侍御

其三

遊子魂無憶故鄉一身天地任茫茫車前素旆悠揚去
猶帶西臺御史霜

其四

莫恠休文減帶圍由來僂骨不勝衣孤山一片梅花月
可是能騎鶴背歸君杭人也

荅李侍御惟貞時方按柳州

瘴色驚霜一馬驄
故人誰似李端公
柳州垂柳應無數
心在襄西落木中

其二

鄖嶺春初雪不殘
柳江風物已堪觀
莫言嶺表無他寄
蕉實能黃荔子丹

春寒東閣外花事未動有感

陰風獵獵雨絲絲
苦勒新紅未上枝
人道春光從此出

不知元自得春遲

其二

空傳驛使到天涯
不見梅花寄一枝
弇山園裏千團玉
盡日嬋娟為阿誰

聞敬美使秦中要取道太和一晤

懷中白璧月同圓
縱入秦庭莫浪傳
可怪人間無合處
鄖江虹色已經年

其二

蓮花朵朵撲函關使者褰帷紫氣間分付錦囊收拾盡
與君移較太和山

摘桑甚作供二絕

鄭中初夏櫻桃後無它果惟後庭有老桑二結
甚頗繁指麾兒輩摘嘗之初縮朒不上樹蓋南
中諱以為儉歲之食故也記張天錫自涼州歸
晉人或詢涼風物天錫云桑甚甘香鴟臬革響
又謝公問北味有王甲云桑甚可比黃甘恐公

不信候熟時馳駿馬采供公大以為美云此味
佳何黃甘之足儼然則桑葚固嘗比肩名果薦
御王公矣戲成二絕用以解嘲

薦紅黝紫簇成堆但摘兒童莫更猜說與故園風物好
玉盤冰醴浸楊梅

其二

涼州遮莫小江南桑葚雖鮮也未堪解道謝公懷遠畧
已誇風味勝黃甘

贈寄陳道易

處處憑鐫幼婦辭銀鈎
榻得慰相思襄陽峴首依然在
千載惟談墮淚碑

其二

休汝母言計盡非麥田雖薄價還微
吳閭舊俗君應曉
垂橐歸來未當歸

以曾益州筇杖并詩贈九十七左翁

百年蹤跡僅庭除
母事門人進筍輿
欲識使君珍重意

益州方竹右軍書

太和絕頂贈敬美少參弟時游自太華新領部南

康為匡廬主人

玄嶽能玄太華青到來詞筆動山靈莫言遷客思波少
何似金門老歲星

其二

太和宮闕寫黃圖匡廬舊稱天子都共是玉皇香案吏
不妨南北領香鑪

其三


汝兄新賦未堪難嶽色撩人試自看但使登高須授簡
主恩新拜大夫官

其四

鴛笙鳳管寫潺湲豹尾熊幡簇滿山疑是茅君兄弟別
未分天上與人間

王上饒將入覲與余有酒人燕市之約尋余赴留
任歸里君亦當便道省覲走筆戲贈

駟馬于公愛里閨雙鳧葉令畏京塵新豐酒價毋勞問
且作高陽社裏人



弇州四部稿卷五十二

欽定四庫全書

集部

弇州四部稿卷五十三

四

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官中書_臣張墀

謄錄監生_臣張曾溶

欽定四庫全書

弇州四部稿卷五十三

明 王世貞 撰

詩部

七言絕句五十二首

由鄭江抵均州即事

下江雙槽鳴啾啾上江槽聲亦不柔
今春三月桃花水不似常年竹箭流

其二

龍渦漫漶砉然鳴小灘大灘勢欲爭棹入前崖渾不見
還從闕口出歌聲

其三

大石奮攫獅王身小石槎牙不可馴若令水清能見底
更有眠虬愁殺人

其四

落日未盡新蟾催無那層崖黯不開一線金波初欲動

錯疑神女送珠來

天柱峯

以下太和山諸詠

生平漆室意堪憐
見語中峯便躍然
盤到最高金頂上
依然無際蔚藍天

顯定峯

顯際神光無處蹤
定時賢劫不相逢
老夫擬向峯頭住
自取捷槌撞曉鐘

皇崖峯

雨脚霏霏暖不收
皇嵒風起忽成妖
浮雲半捲青天外
一線襄江抱日流

大小筆峯

七曜天文萬古看
長餘綵筆插空寒
欲書人鳥宮中事
龍漢年來罷史官

七星峯

天上白榆秋歷歷
人間翠嶺畫亭亭
自從題壁新詩就
北斗行中見一星

中笏峰

手板三時朝紫宸
天符九錫下青旻
自能鶴禁辭王位
不向高真道寡人

千丈萬丈二峯

高峰掃地一萬丈
低峰突兀千丈餘
三山琪樹稍加汝
二華蓮花恐不如

大小蓮花峯

大蓮花峯房欲披
小蓮花發蓋離離
莫輕游子無僊骨

我解栽花發火池

落帽峰

戴僊掉頭躡白虹有帽却墮罡風中不憂天地為絕倒
何物人間老禿翁

白雲峰

春來元氣日氤氲大巖小巖屯白雲山人自是陶弘景
縱有那應分贈君

大明峯

燭龍雙炬破南荒散作峰頭萬疊光縱有天雞君莫聽
不煩紅日起扶桑

五老峯

前年踏雪匡廬過今年暮春游太和五峯老人如舊識
不似當年白髮多

三公峯

金頂煒煌帝座開三峯那不號三台雨後前山飛瀑過
共言天上白麻來

九卿峯

窈窕崔嵬面面逢
九霄青對九芙蓉
欲知身染烟霞色

香案前頭第四峯

予前為太僕
於九列第四

僊人峯

瑤花琪草徧僊山
山色長依天地間
莫道五通無一驗
也能雲雨向人間

獅子峯

調刁風過忽雄鳴
一竅能瘖萬籟聲
雪後莫尋狐兔跡

只今羆虎不留行

紫霄峰

千崕過雨欲黃昏
鐘鼓朝真未掩門
自是此峯饒紫氣
不關曾著五千言

香鑪峯

日氣初濃雨色孤
青烟片片起香鑪
還將一瓣祈天帝
乞取真形五字符

展旗峯

獵獵峯旗空際磨千山草木見還無天策府中玄甲隊
淮南節下黑雲都

玉筍峯

初開噫氣吐青蘋萬木峯頭自起斂却似渭濱春雨後
籜龍無際欲張鱗

丹竈峯

縹緲僂蹤未可非至今猶說彩雲飛祇愁天地終須盡
煉得丹成無處歸

天馬峯

網緼滅沒不可求
矯若長空騰紫騮
天上房星應不謬

人間此嶺屬房州

此峯獨屬房縣

雞鳴峯

喔喔天雞三兩聲
招搖北指漢南傾
九關應是無豺虎
排比雲輜覲玉京

九渡峯

曾介長房謁汝翁
壺中天地儘堪容
只教三試還難過

九渡深溪九渡峯

伏魔峯

三尺青熒太乙波鑄成魔欲柰吾何山深莫道多魔事

屈指人間事事魔

松蘿峯

清泉古槭坐盤陀覽處無多會處多土木時來俱綺繡
茲峯不改舊松蘿

會僊峯

王母戴勝凌弱波上元夫人持底過雙成拍手為余唱
少壯幾時柰老何

眉稜峯

八字春山淡淡秋微雲如黛雨如油自從名挂朝元籍
縱有眉稜不繫愁

金鎖峯

鐵柱洪都壓恠螭龜山金竿繫支祈何如玄帝峯頭鎖
問着僊人總不知

陽鶴峯

老鶴巢杉硤頂圓欲充僊騎上青天何當羽客偏多肉
拳足寒雲不記年

紫蓋峯

飛符霹靂走逡巡玉節珠幡總不真若說古來蛇虎飯
不知何限謫僊人

大夷峯

大夷峯頭天地寬不似武夷山九盤寄語潯陽江上客

游時莫作小姑看

玉虛巖

葛巾藤屨白蕉衫
偶帶中臺獨坐銜
原是玉清宮裏客
不教長住玉虛巖

常春巖

道人高卧麥山崖
時挾青童酣紫霞
戴勝長鳴三月候
條風不斷四時花

崇福巖

若論太上高真福黃閣如雲不要開
簾衣淡飯無他事
一歲看山一百迴

尹喜巖

太上流沙去不還猶餘紫氣在
函關不知元始真人位
玉局張卿第幾班

飛昇臺

鴛笙鳳管奏春風玉節金麾滿
太空今日廣成成後進
不知何事戀崆峒

望僊臺

漢兵南下未央災魚服龍潛隧道開
世外老翁何所與
君王空築望僊臺

禮斗臺

斗柄橫斜河漢微輕風欲襲五銖衣
鈞天一派初收響
摘得金盤玉露歸

紫雲亭

日帝流光射後庭紫雲千古尚名亭
還應獨飽陰符句

大赤天中一將星

自然庵

九轉神丹九已成如何依舊馬明生由來上界愁官府
散誕人間自在行

青羊澗

流沙西去失青牛却坐青羊向益州我效初平仍一叱
可能分作釣魚裘

鬼谷澗

裨闔書同用不同可甘王訓易僊宮欲知幽谷原名鬼
六國游魂出此中

百花泉

密綠成帷紅作茵僊家日月號長春不須流出千般色
一種桃花也殢人

甘泉

清澄絕勝漢甘泉一酌心魂自爽然應是武皇採未到
不教僊觀表祈年

太乙池

淺碧泓停一鏡開
探瓢欲酌更遲徊
孤峯倒插青蓮影
疑是真人坐葉來

向侍御宗洛登玄嶽奉贈得二絕句

均陽秋色未成寒
天柱峯頭雪欲殘
君到浮雲應不蔽
于今日出是長安

其二

一笑君家向子平
辭官五嶽問長生
何如柱史元僂骨

上到天門便玉京

贈別梁舍人鉞

留君且作片時間
紅藥清醕染客顏
莫笑帥厨無可供
案頭長滿太和山

其二

名家舊業已三朝
零落猶餘一鳳毛
今日梁園誰讓席
不如金馬世堪逃

舍人以貧欲乞作王官故止之

寄歐楨伯助教

寄語青氈鄭廣文風流儒雅漢庭聞從它明主題三絕
一絕于今總讓君

丙子鄖臺偶題十絕

燕中車馬興闌干也戀青山也戀官今日真成雙舉肘
戟門山色四時看

其二

放了報申無一事雨晴迴照在東除天公乞得閒風日
恨少人間未見書

其三

漢庭求舊未堪論
列鎮俱登八坐尊
賴得鄖山深更僻
不教衰骨負橐鞬

其四

莫欺憔悴鬢蒼浪
片紙能為百邑霜
昨夜尚書來尺一
始知身是夜郎王

其五

兒童剪紙作元宵
幾盞熒熒破寂寥
點罷燈油千石盡

兩條紅燭導歸朝

于節度點山燈一用油二千石尋入中書

其六

四月榴花未上枝不須惆悵怨花遲
牀頭白酒長教熟也有誇他爛漫時

其七

眼底粗無攪意人要聞鄉信又愁論
交游變故君休恠老態參差漸到身

其八

周妻何肉不須疑一卷維摩靜自持
看到法門真不二
從前綺語盡堪悲

其九

一枕騰騰夢帝鄉醒來依舊在鄖陽
它時縱許春明入
夢處無多醒處長

其十

鼓吹喧闐榮戟新出誇前隊擁千人
無端謾取圖經讀
此地元來是逐臣

雜體四十三首

九言

苦熱

六月苦熱杜門復何道科頭解衣徙坐清陰邊為語諸
君且莫河朔飲我欲一枕上就羲皇眠凜如足踏太行
萬古雪帆若卧對匡廬千尺泉長安道中褊褊者誰子
薰心炙手不畏天公權

五雜俎三首

五雜俎車中纓往復還轍不停不獲已刪六經

其二

五雜俎長信殿往復還君心變不獲已詠紈扇

其三

五雜俎手中絲往復還寄所知不獲已守空幃

三五七言

春汎

蘭為楫桂為檣春波既搖裔春日仍貽蕩歸到橫塘市

欲收平林一抹蒼烟上

秋江辭

風江秋風葉愁孤雲閣遠嶼一鴈落汀洲貪看十五焦
山月帆到金陵不肯收

一言至十言

題竹

娟娟斜日曉烟歌嶰谷泣湘川湄雲室雨襟山帶泉虛
心受澤潤素節破霜堅東南奕奕稱美寒暑亭亭自鮮

籜坼龍鱗蛻白晝梢排鳳尾拂青天似風前倬約霓裳
舞羨雪後飄飄鶴筆僊王氏觸目琅玕難比秀謝家榮
庭蘭玉敢爭妍安得共此君一邱一壑裏與爾聽秋聲
萬仞青林顛

兩頭纖纖

兩頭纖纖梭鳴機半黑半白盤中碁腦膊膊烏隊栖
磊磊落落一男兒

雜言五首

大言

鳥王翼覆須彌谷
龍伯縉連巨鰲六九海
捐波濯吾足
飛率宮庠不堪宿

小言

海沙濛濛散鯤子
標虱懸心中
蓬矢檀槐接壤五千里
蠻觸交兵萬人死

難言

愚公移山衛填溟
呼日東走岱西行
秦皇採藥求上昇

傅節比義取公卿

易言

江流辭峽注清湘
金溝堤旁種垂楊
邯鄲豔姬挑冶郎
長安金多結貂璫

危語

懸度山腰鐵絙靡
惡風吹船入羅鬼
前有竄踰後伏虺
孤臣握兵內慙毀

迴文

春游

綠草芳原平青山一帶晴
玉鞭驕試馬珠彈惹啼鶯
曲奏低雲度杯深貯月明
促歸傳鑰待游冶徧春城

別思

邊塞斷魂愁夜夜枕珊無
夢托君思娟娟月曉留粧鏡
冉冉山秋入畫眉絃柱鴈飛
鈿瑰澁劔文龍遠匣星離
篇成織錦和珠淚寫恨春風
江上枝

靈巖晚步

闕澗遮幽樹低雲薄斷鴻月殘生白小天遠入青空

閨怨

微力展運荷恩休緋金燦赫比王侯肥馬脂車走燕幽
輝光燦目溢道周暈翟孤翔偕不儔依依妾腸痛紛繆
飛花逐風委波流揮淚涕咨怨深秋圍帶寬改條歲道
稀星列漢垂簾鈎蟻啼哀蟬傳梧楸衣寒剪蒞玉指柔
機鳴罷織乍燈收霏霏華露濕衾幃微音戀君幸君留
非耶是耶君思愁圍香柔玉煖新綢薇藿馬足充脯羞

饑往念飽誰悠悠歸哉勗君思昔游

春游

碧瀨春粼粼芳洲徧綠蘋摘花鷺坐鳥飛絮惹游人

人名

渡江口阻風書事

孔涉在茲辰風江淹旅役楓抱秋郭丹月侵衰楊白大
陸雲蒼蒼金山濤間碧游魚石瀨響倦鳥辭張翼天高
澄清氣湛然明空色山僧來何晏鳴鍾會施食籍談彼

岼趣言偃江門石

書懷

少小負高適中林類偃蹇胡為國書徵王接亮非腆自
厭立樊遲冀以問閭顯慕蘭相如垂栖吳武陵遠疾雷
被羣植鄭蘭亦推剪冉冉耕釣年計然嗟已晚

歸懷

二毛遂已侵日暮途胡廣由來歷落士項領何偃仰青
山簡容膝一丘遲歸鞅既謝玄豹姿將求仲長賞

咏落日

冉冉求濛汜蕭蕭映桑梓
朱雲黯猶射空江湛轉綺
靜聞幽禽息瞥見高蟾起
虛白林外偏垂楊素氛靡

春游

越羅敷紫陌飛燕時
相偶好繫木蘭船
春江芊眠柳

戊趙歸思寓姓名一章

嗟予謝安枕榻來
歷荒徼邊聲橫趙朔
代馬騰秋草九塞
張武軍三關羽書
少疲禽息故林
頰魚遵幽沼日歸

荒丘遲寒向戍樓
早白楊興悲風石
虎橫周道千秋胡
敢言生平當自保
將陳乞骸章田間
以終老

晨發真定懷歸有作用前體

震方望欲鼉爛然
明銀海天高湛霜
氣大陸澄霞彩方
欣全趙勝更慚魏
多壘衰謝混俗宜
飛揚雄心改伊昔
蒙國書時維帝元
載牧冀缺遠圖家
吳起深悔疲馬良
念歸長林放麋在
籌邊讓羣人勤王
濟真宰挂冠亦由
余何求復何待

離合

承乏淄青將發有懷故人寓郡望姓字

唱郢同聲人昌辭忽中咽晷影薄下春日垂虞淵轍吳

羣茗忌孤秀亡羊境紛列郎秩今再滿良友將乖別郡

金緋雖被躬余懷日飄瞥詩韻成孤賞討論誰為竭王

天垂碣石雨人隔燕然雪竟爾驅車行音容自茲絕元

漾漾黃河流水聲馳天末秋風吹高原禾黍夕烟滅美

十二屬

歸思

梁苑辭兔耕商丘罷猪牧狗馬病未已龍蛇年可卜世
自饒虎冠吾寧蹈猴沐晝鼠饑獵牀昏雞倦栖木牛羊
下來否相從老空谷

八音

宮怨

金屋踈桐長信秋迷離屈戍片螢流石欄凝露芙蓉冷
紈扇辭颺彩鳳愁絲徵肉奏明月開閒庭徙倚淚潛搯

竹宮祠罷拳姬進桂權歌停掌伎來匏瓜斃斃望織女
箕斗無漿酒星苦土鼓長吞棄後聲冰簧自咽愁中語
革故迎新如轉丸故人善愁新善歡木難元是千金買
不作珊瑚一分看

五行十支

即事有感

銀河乙夜涼無聲此時缺月摧長庚江南愁霖水渺瀰
薊北落日金縱橫是處乾坤淹漢甲何方戊己却羌兵

辛壬未見玄圭錫庚癸空勞素書憶長安丙相虛問喘
丁傅門前馬如織君不見栢梁既火復建章土木之使
春相望

州名

散步郊野間即事有感

索處寡合并三益不我遲散步遵廣隰江干饒奇致流
水青宛轉垂楊綠遙裔波風徐自發脩脩微涼至古墓
交長衢深楸起幽意荆棘日夜生能無雍門淚究客奏

鐘鼓爰居終不豫稻粱苟足謀纓弁非所冀

鳥名

閨怨 六朝體

羈棲鳩鵲妬鴛鴦卧壁懸鶉損鸛鷓借問碧鷄天外影
還入丹鳳夢中鄉烏頭自白君自客鴈足空素妾空房
妾邊比翼偏相惱君處催歸可自傷輕鷗玉剪初分匹
啼鵑銀筯暗成行十二鸞釵容續股三五鶯閨枉斷腸
領燕崢嶸依漢日鬢鴉蕭颯欲秋霜愁似三山鵬海濶

精衛九泥正渺茫

五平體

歲暮有感

江城饒奇寒畸生微懼
惊丹青辭柯條昆蟲司其宮
幽崖栖玄霜枯楊號天風
沈沈水房魚芼芼川途鴻年
齡時推移乾坤吾何終
衰岐殊千端茫然趨余躬
溫筭為醜顏嗟哉須臾紅
寧如飯無生羣憂由來空

五仄體

晚步偶述

海國歲倏晚索處意不憚飯罷一鼓腹偶往若有得積
雪釀野態古檜媚石色稍稍究僻逕忽忽任短屐落日
墮鳥背一抹太宇碧未許大阮慟且共賜也息列燭映
散帙嗒爾更閒寂曷不但飲酒短髮日可摘

數名

感懷在青州作

一壑違遂初謬干有司試二褰通閨籍執戟聊需次三

守尚書郎屏營虞吏議四遷剖符竹遂領東方騎五子
散中原幽懷誰予寄六奇內慚寡儋珪馬所覲七發既
未工安能令紙貴八翼衝天門疇為折其翅九辨哀屈
生獨灑咸陽淚十載冠惠文徘徊能無愧百折衝波間
鋒鏑盡排墜千石俄已逾秋風發歸計萬分竟何補寥
落身後事

將軍名

即事

樓船出下瀨車騎屯新平墜鳶伏波道理雪度遼營祀
連饒戰馬蒲類恣長鯨俯仰宇宙間飛檄正縱橫空懷
決勝筭前轍有餘驚

宮殿名

擬古

昭昭陽春色桃李吐華光流年若飛雪曷不日鼓簧美
人絕代姿行步蘭椒芳贈我合歡歌報以萬年觴物候
誠駘蕩為樂殊未央

又

四候無長春七情無長樂零露及朝陽浮彩須臾鑠方
欣朱明晷閭闔風間作戀戀千金軀疇施萬年藥含德
以自滋逍遙於林薄

集句

懷李于鱗戲集李杜各一首

雙珠出海底飛在白雲端海月明可掇不為世人觀長
鯨正崔嵬為我揚波瀾一朝攀龍去獨宿天霜寒掩淚

出故房清晨起長歎酌醴焚神魚問言誰與餐方希煉
金骨並乘雙飛鸞

右集李

長嘯宇宙間揚馬宜同時前輩復誰繼名家信有之博
采世上名得失寸心知李侯有佳句突過黃初詩伊昔
臨淄亭痛飲真吾師佳人絕代歌行酒雙透迤掌中琥
珀鍾照耀珊瑚枝快意八九年浩蕩從此辭終悲洛陽
獄朱鳳日威蕤千載得鮑叔棄我忽若遺飲酣視八極

歲暮有餘悲

右集杜

舍弟有投贈之作叙致酸楚余不能復續漫集杜
句酬之凡十韻

春色生烽燧關山信月輪帝鄉愁緒外梁獄上書辰社
稷纏妖氣生涯脫要津艱難隨老母寂寞向時人年事
推兄忝門庭畏客頻要聞除獬豸獨泣向麒麟磨滅餘
篇翰飄零且釣緡百年歌自苦一字買堪貧耕鑿安時

論泥塗任此身今秋天地在懷舊益沾巾

自青州發明卿書有感

有客乘舸自忠州語不驚人死不休念我能書數字至
悲君已是十年流可憐懷抱向人盡一辱泥途遂晚收
跨馬出郊時極目春風回首仲宣樓

嘲俗子

鄉里兒童項領成客至從嗔不出迎安得壯士擲天外
吾與汝曹俱眼明

戲集唐句示子念

長安城中足年少論交豈必皆同調前門長揖後門關
當面輸心背面笑薄俗嗟嗟難重陳萬事翻覆如浮雲
欲向何門覓珠履令人常憶平原君

彭城道中夜得上谷王中丞遺余成製錦裘不知
余尚未御此服也走筆集古詩句為謝

朔風吹塵暗河縣長夜漫漫何時旦鄉里小兒狐白裘
美人贈我錦繡段五陵衣馬自輕肥楚人四時皆麻衣

報君一語君應笑恨不相逢未嫁時

懷肖甫鴻臚將之留都集唐句候之漢中

青山歷歷水悠悠一任斜陽伴客愁更把玉鞭雲外指
計程今日到梁州

其二

紅葉青山水急流思君不見下渝州明年此夕游何處
謝眺青山李白樓

古意集古句

年時二七猶未笄芙蓉如面柳如眉十五嫁為盧家婦
暗開脂粉弄花枝兒家夫婿多輕薄妾心無趣坐傷離
紅綻櫻桃含白雪為君起唱長相思不知貧賤令人老
慎莫富貴忘我為

聯句

春夜順甫子與見過

上苑春將盡虛堂夜未央裳過頻先緩帶歡至促飛觴

世貞舊侶仍蘭署新詩自柏梁中行羣猜吾敢惜萬事

爾俱忘裳

近眼難禁醉看人且鬪狂

世貞

哀絃任楚袖

短笛據胡牀

中行

傳菜青浮甲調酥玉縷粧博喧鳥扼

雉琴語鳳酌鳳

世貞

慘淡梁園月細縕漢殿香

裳且饒

宮漏永騎馬破蒼茫

世貞

弇州四部稿卷五十三

欽定四庫全書

弇州四部稿卷五十四

明 王世貞 撰

詩部

詞九十三首

望江南 夢故鄉作

無箇事相枕睡初酣
青織晚潮縈似帶
碧攢春樹小於簷
遮莫是江南

又即事

歌起處斜日半江紅
柔綠篙添梅子雨
淡黃衫耐藕絲
風家在五湖東

又思家

回首處薄業太湖干
半艇春洲蘆笋綠
一樓風雨杏花
寒此景放誰看

又書所見

春睡足釵玉自欹斜
立傍鏡臺還脈脈
枕痕纖甲印桃

花來試雨前茶

又 病後戲作

閒囑病慎莫忌多才夜雨鬆它溫錦帶霜天負我軟金
杯怕汝又安排

又 有感

無限事斷送在長安只見前人前事好後人誰道後人
難青史不勝寒

又 晚步

隨意步芒屨破蒼苔半壁雨收殘日去滿江風送晚潮
來此景亦悠哉

如夢令

秋思

殘月碧梧金井屈戍繡霜初冷徙倚不成眠紅淚一雙
珠迸孤影孤影長自伴人宵永

又

偶題

韋杜去天尺五日炙錦薦紅腐占盡洛陽春不放東君
做主何處何處歸夢一蓑烟雨

又感懷

剛是子規催去又被鷓鴣留住行不得哥哥烟雨江南
何處難據難據央箇醉鄉為主

生查子

離恨

頻餘翡翠簪漸緩鴛鴦帶十二鑄愁鑪百煉芳年改
人是此生人債是前生債精衛一丸泥空去填東海

長相思

閨怨

風滿陂雨滿陂雨風風無盡時孤帆天外遲
鶯兒

飛燕兒飛燕燕鶯鶯雙翅低愁他掠翠幃

又 閒情

東陌頭西陌頭陌上香塵粘碧油見花花自羞南高
峯北高峯兩處峯高愁殺儂行雲無定蹤

浣溪沙

江南詞

一夜春波釀作藍曉桑桑葉綠髮髮鴟髮十五太驕憨
織就雙魚成比目偷將百草鬪宜男更無心緒餵春

蠶

又春悶

牕外閒絲自在游
隔山花鳥弄鞦韆
一庭芳草怨清幽
權把東書鈎
午夢起沽村酒
潑春愁
放教殘日過牆

頭

又閨思

金博山頭半吐烟
玉凌波底未舒蓮
韶光悄悄恨綿綿
柔似女蠶春再浴
困如人柳日三眠
細箋心語襯胸

前

又立春日病中作今
歲逢閏首尾兩春

柏葉金花自趣人青絲白玉未沾脣半牀衾冷半殘身
幾度黃楊猶厄閏一年衰草再逢春東風為我太慙
勤

謁金門 落花

風漸陡排比餞花春酒憔悴一枝紅欲皺問花花戀否
寂寞乍長清晝無計與他拖逗猶勝銷魂人去後折
來還在手

菩薩蠻 春游

長干陌上無相識一尊偏領春山色黃鳥轉青枝銜花
墮接羅不須愁遠道醉即眠芳草何處酒家胡文君
正倚壚

又 太白樓作

高樓百尺攀星漢東秦十二誇雄觀野曠覺天低天迴
海樹齊誰教狂李白獨起千秋色而我亦歌呼乾坤
一酒徒

又迴文

白楊長映孤山碧
碧山孤映長楊白
春暮別傷人人傷
別暮春 鴈歸迷塞遠
遠塞迷歸鴈樓倚
獨深愁愁深
獨倚樓

又

斷風依約愁砧亂
亂砧愁約依風斷
無語對燈孤孤燈
對語無 冷香留去影
影去留香冷思後
夢來期期來
夢後思

減字木蘭花

楊花亂起搖蕩春光千萬里無限長條牽惹行人東陌
橋 楊花落盡也有暮鴉來借問且管生前身後浮萍
最可憐

又

楊花無語昨夜月明今夜雨斜拂征鞍不問行人便折
看 楊花且住山鳥不啼春已暮試上章臺唯有東風
依舊來

眼兒媚 春愁

青草茸茸正芳柔
倩雨釀春愁
問愁幾許剛來一寸眼
底眉頭
少年無限人間事
拋擲向東流
而今只辦三
杯軟飽塗抹窮愁

醜奴兒令 題畫

洞庭楓落胭脂冷
蠹尾香鈎舴艋輕舟
一任霜風自在
浮
綠蓑衣底寒雲膩
蒲底槎頭缸面新
篳縱有秋聲
不起愁

又春情

落英堆砌無人管
幾點鶯紅偷入簾櫳
要與多情訴晚風
鴛鴦被冷驚春睡
羞把菱銅感損眉
峯不為風狂也似儂

更漏子

楚天低雲葉瑩飛
迺畫樓還凝蘭口
感雪牙攢一聲春
月寒燈才瑩香初
燼又被子規催緊
最是你柰何人
臨歧波眼頻

阮郎歸

畫橈初見柳邊來，相逢青眼開。
六么檀句軟金杯，飛花小令催。
從別後，思難排，柴門依舊苔。
起按紅豈獨徘徊，新詞憑夢裁。

甘草子

四時

春暮密打窻紗陣，陣梨花雨，
鞦韆匝，迸臉脂綺袖，調鸚鵡。
輕暖軟寒相剝剝，做不痒不疼，
心緒倩得張郎畫眉。
嬾任子規，淒楚。

又

長夏懶約釵鈿腕素偏幽雅越苧水精涼楚簟玻璃研
如醉如醒朦朧者忽小彈花陰牆下怕是蕭郎故相
惹去問他真假

又

秋半密約剛逢天上菱花滿掩面扇紈輕可體衫羅緩
丟抹腰紅勾雙腕笑指那嫦娥無伴竊藥欺郎行偏
短守廣寒空館

又

冬盡玉澁鴉寒落照看看准別館閉獨兒為侍郎來穩
暈月旋收霜仍緊怕去路香蹤還認百計悽惶為他
穩屐齒鋪粧粉

朝中措

病起飲酒

是誰嫌我酒間過咬得病來磨無耐業緣尚在清尊又
倚清歌 高陽舊侶頻頻相勸不飲如何屈指乾坤佳
事鑪頭領取偏多

少年游

病後

朝來風面太嶙峋
逢着怕他嗔
篆烟磨冷
東書挨破
無計放吾顰
故園兵火何時斷
歸夢碧山貧
病骨難低
酒腸新窄
羞見意中人

又
愁

萬羣哀鴈破蒼茫
無語立斜陽
遠山幾點
高城千堞
縱是向昏黃
欲將杯酒和情鬪
情至酒先降
剝掠腰圍
撥扶心淚
釀作鬢毛霜

西江月 戲贈奕者李生

未轉頭時是夢此心安處為家一枰敲作冷生涯管甚
三冬九夏 脚底東西自在人情厚薄由它杯盤隨分
有些些且向花前醉也

怨王孫 春病

無柰春去弄晴弄雨醞綠瀉紅嫩寒柔暑籬外誰展新
蹊乳鳩啼 五陵油碧斜陽外輪聲脆幾點平蕪碎獨
餘病骨依舊掩却簾櫳怕東風

又寄思

愁似中酒難禁
廝守織雨黏雲
困花酣柳
猛見雙雀金
翅暗魂消
那人偏自沾情緒
丟不去
只傍眉峯住倩
他夢裡相會
無那嬌鶯兩三聲

鷓鴣天

書懷

中酒朝來仗酒醫
愛花身老妬花飛
扶持白髮無長計
點染朱顏有片時
悲落魄
笑支離
世情原與世人宜
青山不用金錢買
只礙當頭一小兒

又寄懷

峭雨零霜船棹歸
玉顏初醒帶寬垂
閣殘吳苑千金笑
低損成都十樣眉
能幾日又分離
別來疑夢復疑非
莫將心向天公語
天上雙星會幾時

又漁舟

蘋末風吹舴艋舟
盪寒村酒兩三甌
蔚藍天起魚鱗皴
罨畫溪穿燕尾流
無一事不知愁
綠蓑衣墊卧船頭
相逢莫詫無魚賣
自是平生用直鈎

又

尤子求畫玉洞桃花萬樹春為南屏伯子壽余
題是詞昔東方曼倩偷桃三度王母嘗喚為小
兒伯子方六十寧不為徐氏之雛也

度索山頭根未枯天台移作美人都霏微映水霞千片
綺旒含風錦萬株穿屈戍點屠蘇千年結子解偷無
若教王母而今見喚作徐卿第一雛

木蘭花

一名玉樓春

是誰約勒東君去枝上曉聲寒杜宇柔綠猶能抵死留
妖紅不解逡巡住 灞陵一陣飄香雨宛轉玉駝蹄下
土記他含澁折苞時總有千金無贖處

又 秋思

金堂鳳蠟勻紅淚簾外一鈎霜滿地鴛鴦被冷不成眠
兩點瞳人剪秋水 千迴萬結心頭事熨貼相思裁兩
字不須支枕盼天明十二時愁從此始

虞美人 別思

摩訶池上金絲柳，慣愛纖纖手。折來將表片時心，記取
淺黃柔綠淚痕深。博山香細銀燈吐，乍識黃昏雨。嬌
花欲展半鵝紅，錯道褪殘春事，罵東風。

又寄懷

浮萍只待楊花去，況更廉纖雨。鴨頭虛染最長條，醞造
離亭清淚幾時消。珊瑚翠色新豐酒，解醉愁人否。薄
寒攏送汝南鷄，偏向碧紗厨畔醒時啼。

南鄉子

怨歡

薄行總難熬剛把黃昏醉玉簫妾似鳳凰橋下月空撈
郎似初三十八潮 猛見舊鮫綃幾點飛紅暈翠濤點
起那籌和淚滴心苗火片真情冷地消

踏莎行

玉琢娉婷津含旖旎青絲細綰雙鴛尾當時一寸暗同
心臨歧總結秋波內 鴈返吳楓魚游淮汜那堪山嶽
倉皇起便尋桃葉到天台教予懶向空林醉

漁家傲

細雨輕烟裝小暝重衾不耐春寒橫裊盡博山孤篆影
閒自省天涯有箇人同病 十二巫峯圍畫永黃鶯可
喚梨花醒兩點芳波揩不定臨晚鏡真珠簌簌胭脂冷

蘇幕遮

遮 病中夜坐聞隔
席歡笑有感

翠鑪烟紅燭雨雨底銅壺滴到難捱處欲作新詩心自
語身入中年怕作關情句 酒如油花似霧談笑風流
一霎拋人去病與窮愁相伴住牋懇天公殘日休如許

青玉案

閨怨

鴨頭波軟濃於耐風起處青初皺乳燕雙雙簾幙透梨
花未雪綠楊猶絮蠶飽桑陰瘦無端釀出清明候忽
憶城南乍分手十二雕欄寒更陟踏青人遠鬪茶時近
滋味如中酒

臨江仙

癸丑元旦醉題

撥乳醪酥新綠泛金花巧勝初裁東風殢雨印泥苔臘
隨殘漏盡春逐燒痕來昨歲貪杯今歲病病時依舊
貪杯欲填新令雪兒排小園梅未吐先報一枝開

又詹簿兄遺
子鵞鰾魚

有客青州常從事雨中相對留連吾兄折簡赤鬚傳鵞
兒黃似酒鰾鼻大如船故國風光俱入眼眼中偏愛
偏憐欲因彈缺問當年先生何所有首宿滿新盤

又

遲日三眠渾似柳起來徐步閑庭中年風物易關情不
知因箇甚撩亂沒支撐我笑殘花花笑我此時憔悴
休爭來年春到便分明五原無限綠難染髮千莖

又封太史韓
友蘭壽

多少神僊官府在少無拘束仙官此翁仙福漸來完
庭前饒玉樹海上有青鸞為問青鸞消息地一韓曾使
三韓安期持底與傳言如瓜雙火棗捧日一金丹

一剪梅

登道場山望何山作

小籃輿踏道場山坐裏青山望裡青山漸看紅日欲銜
山湖上青山湖底青山一彎斜抹是何山道是何山
又問何山姓何高士住何山除却何山更有何山

天仙子 酷暑

萬疊火雲堆落照一抹青山連晚燒不教蘋帶吐微颺
天轉峭星仍鬧長安爨就紅鑪小 枝上忽聞蟬語噪
為問西風何日到男兒失足墮京塵炎也噪涼也噪不
如銷夏灣中好

河滿子 春郊獨行

卵色遙垂別浦魚鱗淺甃平沙小拂東風無甚力悠揚
自在楊花輕暖輕寒天氣半村半郭人家 碧貯蓮花

露酒香分穀雨前
茶呼取自斟
還自勸烏紗
任汝欵斜
返照一行歸騎
隔林幾點殘鴉

滿路花

初春游目即事

穿芽徑字青壓水
冰文綠山城
初雪罷添粧束
誰家獵騎
掠碎千崖
玉貂裘斜半揭
馬尾捎生問人何處堪宿
青帘高寫美酒新豐
熟春色偏占早花如簇
珠簾十二處處調絲竹
夜闌金縷曲
唱道明朝扶頭依舊醺醖

水調歌頭

上巳日

三月又三日上巳復清明問君幾許高興兒女隊中行
數點洗塵芳雨一脉養花天氣信馬出郊垆年少五陵
子金彈惹流鶯過油壁低粉面按銀箏管絃絲竹何
限應自勝蘭亭共酌幾杯春醕也插一枝楊柳歸袖任
縱橫聽取九門鑰隱隱下西清

又

記丁未清明為上巳予與同人出游西郭杯酒
落魄頗諧幽興遂成水調歌頭一闋今為庚申

十又四年矣復遇上巳前一日清明偶與張郎
及一二兄弟信步舊游雖風景不殊而憔悴非
昔幽憂懣結徒增悽愴因復按前調遂成一詞

并書遺張及一二兄弟庶有和者消予磊塊哉
遲日捲殘雪蒲柳弄新晴滿城兒稚謔笑為我報清明
花破青樓冶女草媚上闌游騎金粉出鞦韆幾處上墳
返香淚濕盈盈對新景追往事歎飄零十年回首一
夢今日負平生依舊禁烟時月也解來朝脩楔憔悴不

勝情滿眼夕陽色都在漢宮城

洞僊歌

傷亂

金錢磨破難迂江南信巴得書來更添悶道姑蘇臺畔
留却幾叢麋鹿草約畧秋風又盡向時佳麗地結綺
臨春醞釀韶華付寒燼便長洲陌上有日言歸家已破
廢井荒烟無準刺幾箇遺民怕都來不是舊時人向誰

尋問

鳳凰臺上憶吹簫

愁

經雨斜陽壓雲西
嶺冉冉欲墮還浮漸
譙樓三點喚起
千愁與醉平分此
夜猛地裏醉去難
留紗窓上微風撼
醒揩拭雙眸
悠悠帶人住也
千百處攢心幾處
堪休似粘天衰草
販浪殘舟悔殺太
平風景等閒過
拋擲東流
尋思遍何年
向人覓換眉頭

桂枝香

懋賢兄於予為先姑子同奔急難俄爾告歸黯

然問別

東風一騎幾日發長安欲留無計猛見柔黃嫩綠壓冰
成水青山處處青螺小隱孤村夕陽鴉背那時離別除
非醉後不教愁死 記歲暮停橈淮汜急難甥舅窮途
兄弟雨妬霜驕了却半生滋味臨歧不盡心頭事怯鄉
愁難更提起渭城人酒點點滴滴渭陽人淚

法曲獻仙音

題雙湖卷
贈周君壽

刺水分江柳堤梅坵屬玉聯拳鳴喚浸玉漬珠釣童浣
女芙蓉並頭凌亂看皓月金波散俱涵一輪滿 水晶

館問東君酒卮無恙長日裡蘭舫繡颿相綰掩映翠琉璃似佳人一對纖眼碧漱紅酣滾東西止隔花岸待年年歲歲倒着接羅還健

鵲橋仙

七夕

冰盤薦巧珠簾堆瑩半捲生綃光綴嫦娥妬眼便西沈又早倩羲和催轡多情瑞鵲填橋度我何不曉來迴避但教三萬六千年也不弱人間百歲

百字令

青州閨武偶成

竹符銅虎是何人管領東方千騎畫戟瑠戈霜萬疊獨
讓些些麈尾壁月辭繁蓮花離匣馬足寒飈起雷奔電
擊一麾波靜如洗 屈指斧鉞行邊樓船橫海濟甚人
間事塗抹走吾天地老眼底英雄而已九合諸侯一匡
天下自是真男子嚮微管仲吾其被髮人矣

又

王明佐別創新詞數闋見示流麗清圓殊富風
人之致僕素拙於調未敢效顰聊據古大江一

章為贈辭既不工更慚作者獨記區區傾倒於

王至耳

柳驕花橫未全受眼底封姨拘束不為章臺春做主為
有王維新曲翡翠簾垂鬱輪袍就字字敲金玉櫻桃微
綻一聲扶醒紅綠堪羨鳳縷瑤箏鸞鐫牙版羯鼓催
相逐換羽移商才不盡那怕周郎回矚和雪人稀奏薰
絃斷昨夜東皇恧罰教塵世白頭長自空谷

滿庭芳

春夜不寐

尖側東風迷離烟雨只解排比黃昏一燈清映炯炯淚
珠痕薰盡銅鑪香爇相思被熨帖難溫那堪更穿花玉
漏點點出長門無端千萬種新愁舊事來往紛紛總
成就天涯一病身捱得鄰鷄報也權撇下幾件銷魂還
禁架楊花燕子遲日悄庭閣

又

碧嶼遙攢綠波新剪淡月微暈梨花薄羅香袖十指秀
瓊芽任不寒暄半語背人處猶自憐他那堪更朱唇皓

齒錦字走龍蛇 瞥然還暫去司空見慣老子難捱強
將來對盃眉語交加怕被旁人看殺洛城裏難坐羊車
臨岐約畧羅過訪休許露些些

又登道場山作

一雨催涼千岬吐秀萬壑爭效潺湲暫停籃筍攜杖翠
微間點點龍鱗玉甃堪憐處屐齒敲慳朱欄外粘天萬
頃七十二峯間 呼尊誇更有松颯鳳吹雲岫鷓鬣又
誰送黃鸝巧唱綿蠻漫問何山最好爭應道還有何山

能移興新晴月色飛步上孱顏

傍有何山亦佳

又

閏六月初七夜
戲為天孫賦此

玉露初零金飊微送銀浦垂靜還波七襄人倦纖手擲
魚梭記得年時此夜雙星聚樂事還多生綃底天鷄唱
醒低語別牛哥 黃昏腸斷處無情烏鵲忘却填河漸
轉低瑤斗蹙損青蛾方悟朱明宰閏排年月恨殺羲和
常記取人間天上要好便多磨

夏初臨

苦熱簡王參軍

燕訴餘愁蟬鳴新怨千
咬萬弄斜陽斗大書齋無端夏
日偏長碧紗單捱流光
颯殘榴褪盡紅粧孤松猶瘦清
陰正稀難據胡床
常時河朔避暑傳觴醉鄉天遠歸
路倉皇隱囊紗帽故人別號清涼
但過何妨對彈碁散
帙焚香逞踈狂高歌羽聲片片飛霜

雙雙燕

俞仲蔚有畫眉養之二十年竟以老死仲蔚不
忍敝帷埋之花下余為詞弔之

廿年恩養念暖幌雕籠一時勾了低聲軟語泣別殢情
京兆無柰春山頓老况冷斷如簧雅調辭君豈為無魚
歎汝難同凡鳥驚起鉤簾淺照見嫵月初生似他波
俏飄黃摧粉總博綠愁紅躁誰破芸牕乍曉怎忘得雙
鸞纖妙知否御愛開元鸚鵡墓傍新旒

滿江紅

五嶽先生天原付一雙高屐端只為幾篇詩句漏伊消
息空自挂冠神武外依然乞食銅駝陌記玉鞭環珮夜

朝天空陳迹 青鬢在還垂 白血淚灑都成碧 歎帝城
宮樹夕陽秋色明 日酬他遷謫恨 西風戰盡英雄策 喚
白雲隨我共歸來 人方識

又題高宗賜岳武穆詔
後次文徵仲待詔

御墨淋漓到飛字 百身難贖彈指罷 遺黎夢斷舊都淪
覆十二金牌丞相詔 風波片紙君王獄 恨當時巧放兩
人歸 乾坤感 翹首地 青衣辱回馬 地朱仙 哭笑大江
東 去一夔茲足北面生 看臣構在南枝 死望中原復痛

他年降表出臯亭
鳩夷目

春雲怨

飲酒

風儻雨憊漸柳眠無力
花如中酒睡怯象牙寒
悄幽夢幾回渾不就
燕搗華絃鶯調清管
細譜新詞杜鵑噉行
路方難歸期無據
愁與悶相守芳醪
點出天公手解
翻寒作暖攏辰成酉
枕畔華胥暫拖逗
青眼朦朧一任
長門送來銀漏未舉
尊前乍停杯後半刻也
堪白首

玉蝴蝶

擬豔

記得秋娘家住臯橋西
弄疎柳藏鴉翠袖初翻金縷鈎
月暈紅牙啓朱唇含風桂子
喚殘醉微雨梨花最堪誇
玉纖親自濃點新茶
嗟呀顛風妬雨落英千片斷送
年華海角山尖不應飄向那人家
惹新愁高樓燕子賺
人淚芳草天涯况尋陽偶然江上一曲琵琶

解語花 題美人捧茶

中冷乍汲穀雨初收寶鼎松聲細
柳腰嬌倚薰籠畔鬪
把碧旗碾試蘭芽玉盞勾引出清風
一縷顰翠蛾斜捧

金甌暗送春山意
微裊露鬟雲髻瑞龍涎猶自沾戀
纖指流鶯新脆低低道卯酒可醒還起雙鬟小婢越顯
得那人清麗臨飲時須索先嘗添取櫻桃味

又題美人捧觴

檀槽細壓紫溜泠泠滴碎珠千斛鸚鵡初贖誰揩醒卓
女遠山黛綠朱櫻小蹙風裊處山香幾曲捧屈卮徐露
春芽一樣纖纖玉何事錦圍翠簇只杖頭一點買斷
金谷靈犀輕囑微酣後記取夜來題目雙鬟趁逐扶俺

向碧紗厨宿誇醉鄉還傍溫柔此際平生足

賀新郎 謝表履善惠酒

春意歸風雨到如今緩紅舒翠一番重起况更索居無
一事鎮日琴書而已待醉也如何得醉多謝白衣能遠
致把葛巾忙却科頭倚胸磊塊故應洗 瓊膏慢入清
尊細似當年掌分莖露雪消春水欲折筒荷充泛駕憑
借麴生為馭直引到華胥路裏遮莫歸來問名姓道清
真表粲頻為主天下事任公耳

又謝汝欽姪惠酒

酒債尋常有閉閒門落花芳晝獨吟搔首可恠袁君相
贈後鎮日唯尋綠友到驕惹傳杯之手從事督郵何足
較但醉鄉別業吾能受君不見洗愁帚清狂阮籍天
應厚醉醒時漫開青眼阿咸為壽猶有焦生風格舊試
問無功知否待徙倚臨風頻喚曲沼游魚堪投饌况隔
簾歌鳥來行酒洗盞罷醉楊柳

多麗

晚春雪後即景

醉飛瓊惱亂瑤池清宴吉玲瓏鳳釵敲碎蕩成滿地飄
霰送天桃武陵幾樹伴梨花杜曲千片妬我春衫粧他
寒食乍驚蜂蝶又猜鶯燕五陵畔雜和烟雨寶馬踏青
轉樊樓上銀箏細炙紅鑪重暖 怯寒色條桑小婦幕
離輕護嬌面展纖彎一雙蓮瓣屐齒香泥粉痕淺冷落
流光萋迷餘景東風無計玉山軟天公老被伊瞞過紅
日幾時見空擔閣無主野芳滿目愁怨

怨朱絃

和王明佐新聲慰其不遇名曰怨朱絃

譜朱絃一片秋聲萬壑松濤銀漢初傾挾徧侯門沈深
似海雕欄十二嬌鶯流蘇帳底小按銀箏啞啞軋軋嚶
嚶罵書生煞橫捻冷裝酸攪破春情我道高山流水渠
道香雲暖雨兩語難憑怎能勾師涓老子證箇分明

酒人哉匕首荆卿宋意悲歌高漸沾纓應徵飛霜倚天
雌霓長河倒瀉珠繩葡萄尚暖蝴蝶猶縈陟被杜宇啼
醒道不如歸去歸去來兮任汝縱橫魚為洞庭清樂鳳

為蘇門長嘯飛躍爭聽何須借天公兩耳枉施瑤京

小諾臯

偶有所感信筆為長短句一首第以新名不足
繩墨曰小諾臯蓋取酉陽生之旨云耳

闔闢以前乾坤之外到了不堪窮際儘追求儘教胡突
依形附氣何處小兒謔語羞殺井蛙蛭蟻說甚麼出世
住世治世黃面瞿曇青牛老子更有那我家司寇伎倆
一般而已賺人處還在此 稷下萬言河間千卷畢竟

沒些巴鼻莫輕容古人瞞過常談俗事粧點幾張故紙
無柰藏頭露尾不採他上計中計下計濁酒三杯清琴
一几別饒借淡風微月受用剝山殘水五更事休辦取
詞餘

折桂令

問先生酒後如何潦倒糲糊偃蹇婆娑枕底烟霞杖頭
日月門外風波儘皇都眼眶瞧破仗青天信脚胡過好
也由他歹也由他便做公卿當甚么麼

又

問先生不飲何如一點篝燈數卷殘書冷却扁舟悶他
五柳淡殺三閭太行路都來胸腹帝京塵滿上頭顱睡
也憂虞醒也憂虞不得醜醜怎便糊塗

塞鴻秋

月昏昏罷轉霓裳隊漏沈沈忽呀銅龍閉冷清清暗滴
梨花淚懶丕丕繡出鴛鴦翅流蘇七寶圍破玉千金賜
猛追尋認做了前生事

水仙子 歸思

日輪晝住下坡車風伯吹開障眼花天公放下單身赦
猛回頭都弄咱告蜂王且散昏衙爭劉項攤場戲要走
儀秦兒童鬪譁談周孔故紙生涯

又 丙辰偶成

蚩尤遍插五方旗饕餮平添八面威於菟長出漫天翅
罵張翁都是你攪乾坤任意胡為老龍呵睡眠多日螃
蜊呵橫行幾時神龜呵曳尾塗泥

畫眉序 春怨

絲雨帶東風點透流蘇問殘夢道衾兒閒半冷暖誰同
紅將暎喚轉鶯鶯香欲散收回么鳳倩他新織雙魚帶
爭信我玉減珠鬆

前腔 秋怨

纖玉上鰕鬚起喚銀鈎挂秋樹恨龍沙天遠鴈足無書
銅壺冷淚滴清鉛金剪澁脂蒿紅絮濃霜斷角遼陽道
知他夢裡何如

乾
坤
大
道
一
氣
化
生

弇州四部稿卷五十四